



COMUNICAT STAMPA

L gran itiosaur de Secëda revën virtualmënter

Tl Museum Gherdëina ie l saur dal 2021 da udëi coche realtà virtuela – y sën bele online

N tòco mez pësc y mez lingiola, de na mesura stramba de belau diesc metri y armà cun dënz spic: L gran itiosaur de chël che i resc fossii ie unic abinei dl 1968 sun Secëda, messova vester n tier da temeï. Tan da temeï che l fova chël possen udëi da daujin dal 2021 inant tl Museum Gherdëina a Urtijëi – de gra ala realtà virtuela. Na pitla cërcia danora uniral bele pità ai prims d’agost sun la plata internet dl Museum.

L *Ichthyosaurus Cymbospondylus*, n retil dl mer che ti semiova a n pësc ie una dla stars dla gran culezion paleontologica dl Museum Gherdëina. Cie che ie restà de si osc fossilisei, vedli ntëur n 241 milions d’ani, à Meinhard Strobl y Johann Comploj scuvier t l 1968 sun Secëda y lascià analisé a Turic. Dal 1986 iesi da udëi tl Museum Gherdëina. “Purtruep lascia i resc di osc mé jaghé tan grant che fova chësc bestion de n tier che duminova per n 100 milions d’ani l mer preistorich Tethys“, dij la diretëura dl museum Paulina Moroder.

A chësc manco cëla l Museum sën de ti vester cun na tecnologia ultramoderna. Sun mpuls dl paleontologh Andrea Tintori studiea Ryosuke Motani, professëur de geologia ala University of California y un di esperc de itiosaurs plu recunesciui a livel mundiel, da n valgun ani i resc de osc de Gherdëina. Chisc ie l sël repert dl tēmp geologich dl Ladinicum y danter i ejempleres de osc de itiosaur plu vedli cunesciui, canche chisc tieres fova mo al scumenciamënt dla storia de si evoluzion.

Scëbën che i reperc de osc ne ie nia cumplec iesen sën stac boni de ricostruì scientificamënter l saur y si ambient. L paleoartista Nicola Castelnuovo à ricostruì digitelmënter l itiosaur sun la basa dla cunescënzes scientifiches y la cunsulënza de Andrea Tintori. “Per trasmëter la storia dla vita stluta ite tl crëp laurons per crië n’esperienza virtuela tres chëla che n possa viver la sensazion dla baites y dl chiet dl mer preistorich cun si fauna“, nsci Castelnuovo.

La mostra virtuela dl itiosaur y de na Secëda che fova dan temporums curida dal'ega dassova bele unì mustreda chëst ann n ucajion dl 60ejim cumpliani dl Museum, ma per gauja dl Covid-19 àla messù unì spusteda al ann 2021. "Per pudëi mpò ti pité al publich nteressà na pitla cërcia metons ai prims d'agost sun nosta plata web n videoclip da cialé online", tlarësc la diretëura. Chësc video ne dà sambën nia la vera mprescion dla realtà virtuela, ma l fej bele nsci marueia."

Dlongia la reprejentazion scialdi daujin ala realtà vëij Moroder mo n vantaje tl proiet video de realtà virtuela. "Cun chësta tecnologia nes adressons a n publich plu jëun y ti purton daujin l valor dla richëza paleontologica de nosc crëps per ti trasmëter nce la ueia a studië y amplië la perzezion dla cuntreda ntëur nëus ite", nsci la diretëura dl Museum Gherdëina, che dij mo leprò: "L ie n proiet inuvatif defin y proietà de viers dl daunì."

La recostruzion virtuela dl itiosaur de Gherdëina ie unida sustenida dal Rotary Club Bressanone-Brixen y dala Kaul Foundation americana.

Per deplù nformaztions

Dr. Paulina Moroder

Diretëura dl Museum Gherdëina

Tel. +39 338 6040477

E-Mail: p.moroder@museumgherdeina.it

www.museumgherdeina.it